

Na resguardà las prestaziuns

(cp) La Partida cristiandemocratica (pcd) dal Grischun prenda posiziun davart l'enquista da Demoscope ch'è vegnida preschentada la gievgia passada. Dad ina vart fa ella quai cun plaschair e da l'autra cun esser fitg surstada. La pcd sa legra dal resultat excellent per il president da la regenza *Mario Cavigelli*. 54% dals interrogads dessian lur vusch al schef dal departament da construcziun, traffic, forestalessers ed energia. Ed era sia lavur prestada fin ussa vegn validada zunt positivamain dad electurs ed electuras. «Quels resultats conferman la reconuschientscha che Mario Cavigelli merita per sia oraifra lavur e ses grond engaschi persunal.» Da quai è *Stefan Engler*, cusseglier dals chantuns e president da la pcd chantunala, persuadi. Ils resultats da retschertgas èn impressiuns momentanas. La pcd dal Grischun è da ferma speranza per ina tscherna meritada ed excellenta dal president da la regenza.

Surpraisa è la pcd dentant dals resultats da la retschertga pertutgant la cumpetenzza per schliaziuns da la partida. Qua stat la pcd sin il quart plaz cun 8%.

«Quellas valitaziuns na reflecteschan betg la lavur impurtanta da quella e da la fracziun da la pcd per chattar schliaziuns.» Da quai è il president da partida, *Stefan Engler*, persuadi.

Uschia ha la fracziun da la pcd mess en il decurs da questa legislatura impurtants accents sin ils secturs economia, turissem, energia ed economia electrica sco era per la qualidad dal lieu. Concret è vegnida integrada t.a. ina incarica d'elavurar ina strategia per ils territoris da muntogna suenter l'iniziativa per segundas abitaziuns. Tar la lescha per la promoziun economica è vegnì pretendì ina vasta analisa, ina strategia per la promoziun economica ed ina focussiun sin quella. La pcd ha demussà ina giada dapli sias cumpetenzas sin il champ economic. Pertutgant la qualidad dal lieu è la pcd s'engaschada spezialmain per las scolas medias e cun ina incarica da manar ina scola per informatica. Tar il turissem è la pcd sa dustada per la lescha da taxas turisticas ed uschia era per metter la finanziaziun dal turissem sin ina basa solida. En cuntradicziun cun las autras partidas è

la pcd era sa messa en qua per schliaziuns constructivas.

«Quels exempels mussan cleramain che la pcd s'engascha constructivamain fitg en il center sco ina partida che vul schliaziuns per l'avantatg dal chantun.» Quai constatescha il parsura *Stefan Engler*. «I vegn dentant ad esser pensum e sfida per la pcd da communitgar meglier ils cuntegns ed ils success.» La pcd vegn a cooperar constructivamain er en la proxima perioda da legislatura per dumagnar las sfidas en il chantun e lavurar activamain per schliar ils problems e quitads da Grischunas e Grischuns che sa dattan tar economia, turissem, migraziun, scola, traffic e finanzas. Attenziun speziala vegn la pcd, ch'è ragischada fitg en il Grischun tudestg, rumantsch e talian, a dar a la solidaritad tranter regions, linguatgs e culturas dal chantun. Per tut quellas sfidas na datti betg schliaziuns patentadas per l'entir chantun. Mintga regiun ha il dretg sin schliaziuns che correspondan a ses bassegns. Cun ina ferma fracziun ed in cusseglier guvernativ reelegì cun sustegn recordial va la pcd vid la lavur.